

## **Hampir 65,000 permohonan FSA2 bercagar Akaun 2 KWSP diluluskan setakat 2 Okt 2023**

**Astro Awani**

**12 Oktober 2023**

**Dagang News**

KUALA LUMPUR: Program pinjaman peribadi, yang menggunakan Akaun 2 pencarum Kumpulan Wang Simpanan Pekerja (KWSP) sebagai cagaran, menyaksikan 64,619 permohonan diluluskan melibatkan kira-kira RM1.29 bilion setakat 2 Oktober 2023.

Inisiatif yang dinamakan Program Kemudahan Sokongan Akaun 2 (FSA2), boleh dimohon menerusi Malaysia Building Society Bhd (MBSB) dan Bank Simpanan Nasional sejak dibuka kepada orang ramai pada 7 April.

Di bawah program itu, pencarum KWSP yang layak berumur 40 tahun dan ke atas boleh memohon antara RM3,000 dan RM50,000 dalam bentuk pinjaman peribadi, dengan cagaran terikat dengan pilihan pengeluaran awal daripada Akaun 2 KWSP pada umur 50 atau 55 tahun.

Daripada permohonan yang diluluskan, 46,805 (72%) dibuat oleh lelaki dan 17,814 (28%) oleh wanita, kata Perdana Menteri yang juga Menteri Kewangan Datuk Seri Anwar Ibrahim dalam jawapan Dewan Rakyat.

Mengikut kumpulan umur, 45,165 (65.3%) berumur antara 40 dan 45 tahun, dengan pinjaman berjumlah RM854.9 juta.

Seramai 18,490 lagi (28.6%) berumur antara 46 dan 50 (RM397.7 juta), manakala mereka yang berumur 51 tahun ke atas berjumlah 3,964 (6.1%) dengan pinjaman berjumlah RM40.5 juta berjaya dikeluarkan.

Mengikut etnik, orang Melayu membuat jumlah permohonan paling banyak iaitu 34,013 (53%) dengan RM639.6 juta, diikuti Cina (14,063 atau 22% dengan RM345.7 juta) dan India (7,627 atau 12% dengan RM143.2 juta).

Mengikut negeri, pengagihan itu didahului oleh Selangor (21,744 atau 33.6% dengan RM467.6 juta), diikuti Kuala Lumpur (8,082 atau 12.5% dengan RM182.5 juta) dan Johor (6,873 atau 10.6% dengan RM127.8 juta). - DagangNews.com

**© 2023 Astro AWANI Network Sdn. Bhd. 200001032668(535275-D) All Rights Reserved.**

Source: <https://www.astroawani.com/berita-bisnes/hampir-65000-permohonan-fsa2-bercagar-akaun-2-kwsp-diluluskan-setakat-2-okt-2023-441442>